

16.10.2019

UKA2019/85

Kalaallit Nunaanni sivisuumik suliffissaaleqisut ornittagassaannik pilersitsisoqarnissaa siunertaralugu periarfissamik iluaqutaanik aamma ajoqutaanik misissuisoqarnissaannik ukiakkut 2020 saqqummiussaqaassat Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Napatok, Partii Naleraq)

Nunatsinni sivisuumik suliffissaaleqisut ornittagassaannik pilersitsisoqarnissaa siunertaralugu iluaqutaanik aamma ajoqutaanik misissuisoqarnissaannik UKA2020-mi Naalakkersuisut saqqummiussaqaassat peqquneqarnissaannik Inatsisartut aalajangiiffigisassaattut Inatsisartunut ilaasortamit Jens Napatok-mit siunnersuutigineqartumut, Siumumiit qutsavigaarput imatullu oqaaseqarfigissavarput.

Naalakkersuisut akissuteqaatimi ilaani imatut allapput, Majoriap ingerlannissaa kommunit suliassaraat akisussaaffigalugulu, Majoriap suliffissaaleqisunut aqutissiuussinissamik tapersersuinissamillu neqeroorutaannut tapertassatut suliniutinik ineriartortitsinissaq kommunip kissaatigippagu, Majoriap ingerlanneqarnera pillugu angusassanut isumaqatigiissutip isumaqatiginninniutigineqarneranut atatillugu aningaasassanik qinnuteqarnissamut periarfissaqarpoq.

Aamma tamanna atuuppoq Kommunip suliniutinik ineriartortitsinissaq kissaatigippagu, tassani innuttaasut imaluunniit suliffissaaleqisut ataatsimoortut namminneq kajumissutsiminnik kommuni peqatigalugu neqeroorummik, sivisuumik suliffeqarsimangitsut ilinialernissaannut imaluunniit suliffeqalernissaannut iluaqutaasussamik tapersisussamillu pilersitsiniarunik.

Siunertanut tamakkununga ulloq 1. Januar 2016 aallarnerfigalugu atuutilersumik Nunarput tamakkerlugu Majoriaq pilersinneqarpoq.

2018-mi Ukiaanerani ataatsimeersuarnermi Inatsisartut suliakkiinerisigut Majoriaq maannakkorpiaq naliliiffigineqaleruttorpoq. Ineneri ataatsimiinnerup matuma ingerlanerani saqqummiunneqassapput, aammalu sivisuumik suliffeqarsimangitsut, immikkut suliniuteqarfigineqarnissamik pisariaqartitsisut, tapersersorniarlugit, naliliineq suliniutissanik aalajangersimasumik kinguneqassasoq naatsorsuutigineqartoq, Naalakkersuisut saqqummiussissutsiminni taamatut ilaatigut tunngavilersornerat Siumumiit paasinniffigilluarlugu Oqaatigaarput.

Taamaalilluni Inatsisartuni ilaasortap Jens Napatok-up siunnersuutaa paasilluaraluarlugu tassunga suliamut assingusoq Inatsisartut peqquseneratigut Naalakkersuisut sulissutigalugu aallartereersimammassuk, siunnersuuteqartup siunnersuutaa aamma Naalakkersuisut isumassarsiorfigijumaaraat innersuullugu, siunnersuut Siumumiit tapersingilarput.

Qujanaq

Henrik Fleischer, Siumut